



sBroj: 02-04-28993-3/22  
Sarajevo, 28.07.2022. godine

Na osnovu člana 26. i 28. stav (4) Zakona o Vladi Kantona Sarajevo ("Službene novine Kantona Sarajevo", broj: 36/14 - Novi prečišćeni tekst i 37/14 - Ispravka) Vlada Kantona Sarajevo, na **87.** sjednici održanoj **28.07.2022.** godine, donijela je

## ZAKLJUČAK

1. Utvrđuje se nacrt Zakona o robnim rezervama Kantona Sarajevo.
2. Predlaže se Skupštini Kantona Sarajevo da u skladu sa Poslovníkom Skupštine Kantona Sarajevo ("Službene novine Kantona Sarajevo", broj: 41/12 - Drugi novi prečišćeni tekst, 15/13, 47/13, 47/15, 48/16, 9/20, 14/20, 16/20 i 17/20 - Ispravka) utvrdi nacrt Zakona iz tačke 1. ovog zaključka i isti uputi u javnu raspravu u trajanju od 30 dana.

**PO OVLAŠTENJU PREMIJERA**

**ministrica Nikolić Aleksandra**

Dostaviti:

1. Predsjedavajući Skupštine Kantona Sarajevo,
2. Skupština Kantona Sarajevo,
3. Zamjenici predsjedavajućeg Skupštine Kantona Sarajevo (3x),
4. Premijer Kantona Sarajevo,
5. Direkcija za robne rezerve Kantona Sarajevo,
6. Evidencija,
7. A r h i v a.

**BOSNA I HERCEGOVINA**  
**FEDERACIJA BOSNE I HERCEGOVINE**  
**KANTON SARAJEVO**  
**VLADA**

**NACRT**

**ZAKON**  
**O ROBNIM REZERVAMA KANTONA SARAJEVO**

**Predlagač: Direkcija za robne rezerve**  
**Kantona Sarajevo**

**Sarajevo, juni 2022. godine**

~  
/°

Na osnovu člana 18. stav 1. tačka b) Ustava Kantona Sarajevo ("Službene novine Kantona Sarajevo", br. 1/96, 2/96-Ispravka, 3/96-Ispravka, 16/97, 14/00, 4/01, 28/04, 6/13 i 31/17), Skupština Kantona Sarajevo, na sjednici održanoj dana \_\_\_\_\_ godine, donijela je

NACRT

## **ZAKON O ROBNIM REZERVAMA KANTONA SARAJEVO**

### **I - OPĆE ODREDBE**

#### **Član 1.**

##### **(Predmet)**

Ovim zakonom uređuju se načela poslovanja, struktura, uslovi za formiranje, znavljanje, korištenje, skladištenje, čuvanje, tajnost, finansiranje, nabavka i prodaja, upravljanje i druga pitanja vezana za poslovanje robnim rezervama na području Kantona Sarajevo (u daljem tekstu: robne rezerve).

#### **Član 2.**

##### **(Gramatička terminologija)**

Gramatička terminologija korištenja ženskog ili muškog roda podrazumijeva uključivanje oba roda.

### **II - NAČELA POSLOVANJA, STRUKTURA, FORMIRANJE I OBNAVLJANJE ROBNIH REZERVU**

#### **Član 3.**

##### **(Načela poslovanja i upravljanja robnim rezervama)**

Načela poslovanja i upravljanja robnim rezervama su:

a) načelo snabdjevenosti i stabilnosti – Direkcija za robne rezerve Kantona Sarajevo (u daljem tekstu: Direkcija), posluje robnim rezervama primjenjujući odgovarajuće mjere u skladu sa zakonskim ovlaštenjima, te na taj način obezbjeđuje i postiže snabdjevenost i stabilnost tržišta;

b) načelo tržišnog poslovanja - da se poslovanje robnim rezervama vrši prema uslovima na tržištu i u skladu sa principom jednakog pravnog položaja svih učesnika na tržištu;

c) načelo pažnje savjesnog privrednika i stručnjaka - da su poslovni subjekti koji posluju i upravljaju robnim rezervama dužni da u izvršavanju svojih obaveza postupaju sa povećanom pažnjom koja se u pravnom prometu zahtjeva za ovu vrstu obligacionih odnosa.

#### **Član 4.**

##### **(Struktura robnih rezervi)**

- (1) Strukturu robnih rezervi čine:
- a) primarne robne rezerve u pšenici, nafti i naftnim derivatima;
  - b) osnovni poljoprivredni, prehrambeni i industrijski proizvodi;
  - c) meso i prerađevine od mesa;
  - d) mlijeko i prerađevine od mlijeka;
  - e) masnoće;
  - f) zaslađivači;
  - g) sol i začini;
  - h) konzervirano voće i povrće;
  - i) dječija hrana;
  - j) sirovine, alati i reprodukcioni materijal za industriju;
  - k) oprema i roba za opskrbu, smještaj;
  - l) zdravstveno zbrinjavanje stanovništva;
  - m) higijensko-kozmetički proizvodi i papirna konfekcija;
  - n) asanaciona sredstva.
- (2) Robne rezerve čine i novčana sredstva, u domaćoj i stranoj valuti, kao i hartije od vrijednosti, koje treba da obezbijedi Kanton Sarajevo (u daljem tekstu: Kanton), Grad Sarajevo, općine na području Kantona i preduzeća od interesa za proizvodnju, nabavku i distribuciju roba.
- (3) Robne rezerve su od posebnog interesa za Kanton i nalaze se u vlasništvu Kantona.
- (4) Taksativno nabrojani popis roba koje mogu činiti primarne i robne rezerve iz stava (1) ovog člana nalazi se u prilogu ovog zakona i predstavlja njegov sastavni dio.

#### **Član 5.**

##### **(Formiranje robnih rezervi)**

- (1) Formiranje robnih rezervi vrši se na osnovu plana nabavke, proizvodnje i otkupa tržišnih viškova.
- (2) Poslovi kantonalnih robnih rezervi obavljaju se na osnovu srednjoročnog programa od pet godina i godišnjeg programa.
- (3) Nadležna kantonalna ministarstva daju prijedloge za izradu plana robnih rezervi u dijelu koji se odnosi na robe iz njihove nadležnosti.
- (4) Plan nabavke robnih rezervi Kantona donosi Vlada Kantona Sarajevo (u daljem tekstu: Vlada), na prijedlog direktora Direkcije.
- (5) Direkcija je dužna da prilikom skladištenja robnih rezervi vodi računa o njihovom ravnomjernom razmještanju na teritoriji Kantona, imajući u vidu potrebe stanovništva u slučajevima korištenja tih rezervi.

#### **Član 6.**

##### **(Godišnji plan robnih rezervi)**

Godišnjim planom robnih rezervi utvrđuje se:

- a) vrsta, naziv, količina i vrijednost robnih rezervi koje se formiraju i zadržavaju;

- b) sredstva za finansiranje robnih rezervi i njihov raspored po namjenama;
- c) teritorijalni razmještaj robnih rezervi;
- d) uslovi pod kojima se određene vrste proizvoda koje su predmet robnih rezervi povjeravaju na skladištenje, čuvanje i znavljanje drugim poslovnim subjektima.

#### **Član 7.**

##### **(Kupovina robnih rezervi)**

- (1) Robne rezerve formiraju se kupovinom roba od proizvođača u zemlji, ugovaranjem proizvodnje pojedinih proizvoda i usluga, kupovinom roba od domaćih privrednih subjekata koja se bave trgovačkom djelatnošću i otkupom tržišnih viškova poljoprivrednih proizvoda od domaćih poljoprivrednih proizvođača u zemlji.
- (2) Robne rezerve se mogu formirati kupovinom robe iz uvoza, po tržišnim ili propisanim cijenama, u slijedećim slučajevima:
  - a) ukoliko ponuda roba na domaćem tržištu za potrebe Direkcije nije odgovarajućeg kvaliteta;
  - b) ukoliko ne postoji dovoljna količina roba na domaćem tržištu, a za potrebe formiranja robnih rezervi;
  - c) ukoliko se roba koja je predmet nabavke robnih rezervi ne proizvodi u zemlji.
- (3) Izuzetno, robne rezerve se mogu formirati kupovinom robe iz uvoza, ako je cijena robe domaćih proizvođača kalkulativno veća za 15% od cijene robe iz uvoza.

#### **Član 8.**

##### **(Zanavljanje robnih rezervi)**

- (1) Robne rezerve Kantona zanavljaju se zamjenom, prodajom, nabavkom i na druge načine, zavisno o vrsti i prirodi robe i roka upotrebe robe.
- (2) Krajni rok zanavljanja robe je 90 dana prije isteka roka upotrebe robe, osim ako posebnim zakonom nije drugačije regulisano.
- (3) Poslovni subjekti koji u svojim skladišnim kapacitetima čuvaju robe Direkcije, a u skladu sa ugovorima koje su potpisali sa Direkcijom, dužni su se strogo držati rokova zanavljanja roba koja se nalazi u njihovim skladištima.

### **III – KORIŠTENJE, SKLADIŠTENJE I ČUVANJE ROBNIH REZERVNI**

#### **Član 9.**

##### **(Korištenje robnih rezervi)**

Robne rezerve mogu se koristiti za obezbjeđenje snabdjevenosti i stabilnosti tržišta u slučaju:

- a) obezbjeđenja minimalnih potreba stanovništva u uslovima proglašenja ratnog stanja, proglašenja neposredne ratne opasnosti i proglašenja vanrednog stanja;
- b) nastupanja vanrednih situacija – proglašenja elementarnih prirodnih nepogoda, tehničko-tehnoloških nesreća, prirodnih i drugih katastrofa i drugih većih nesreća i nepogoda zbog kojih nastupa nestabilno osnovno snabdjevanje ili može da nastupi

potpuni prekid u osnovnom snabdjevanju, kao i drugih intervencija u datim vanrednim okolnostima;

- c) intervencije na tržištu u uslovima poremećaja cijena i snabdjevenosti stanovništva i privrede.

#### **Član 10.**

##### **(Poremećaj na tržištu)**

Vlada će, na prijedlog direktora Direkcije, utvrditi šta se smatra poremećajem na tržištu i koje mjere intervencije treba preduzeti.

#### **Član 11.**

##### **(Skladištenje i čuvanje robnih rezervi)**

U cilju smještaja i čuvanja robnih rezervi obezbjeđuje se skladišni i drugi prostor izgradnjom, dogovorom o zajedničkim ulaganjima, kupovinom i zakupom skladišnog prostora.

#### **Član 12.**

##### **(Poslovni prostori)**

- (1) Vlada može poslovne prostore poslovnih subjekata čija je vlasnička struktura u cijelosti ili djelimično državni kapital, trajno staviti u funkciju skladištenja robnih rezervi.
- (2) Izuzetno od stava (1), Vlada može poslovne prostore u privatnom vlasništvu registrovanih poslovnih subjekata, privremeno staviti u funkciju skladištenja robnih rezervi uz naknadu, ako ocijeni da je to u skladu sa općim interesom Kantona i pozitivnim zakonskim propisima, a na prijedlog Direkcije.

#### **Član 13.**

##### **(Obaveze poslovnih subjekata)**

- (1) Poslovni subjekti sa kojima je ugovoreno skladištenje roba iz robnih rezervi, dužni su osigurati higijensko - tehničke i zdravstvene uslove za održavanje robnih rezervi u ispravnom stanju.
- (2) Poslovni subjekti iz stava (1) ovog člana dužni su obezbijediti pravilno rukovanje i fizičku zaštitu robnih rezervi koje su im povjerene, kao i zaštitu tajnosti podataka.
- (3) Poslovni subjekti iz stava (2) ovog člana ne smiju robe koje su u vlasništvu Direkcije koristiti, staviti u promet, otuđiti i promijeniti im namjenu, preuskladištiti ih, odnosno njima raspolagati, bez pismenog odobrenja Direkcije ili protivno odredbama zaključenog ugovora.

#### **Član 14.**

##### **(Osiguranje robnih rezervi)**

Poslovni subjekti sa kojima je ugovoreno skladištenje roba iz robnih rezervi, dužni su robu osigurati kod nadležnih osiguravajućih poslovnih subjekata, uključujući osnovne i dopunske rizike, a u slučaju uništenja, otuđenja ili korištenja robe suprotno odredbama zaključenih ugovora, odmah nadoknaditi štetu Direkciji u ukupnim kvantitativnim i

kvalitativnim količinama ili odmah isplatiti nastalu štetu, na način propisan zakonom i ugovorom.

#### **Član 15.**

##### **(Popis roba robnih rezervi)**

- (1) Poslovni subjekti sa kojima je ugovoreno skladištenje roba iz robnih rezervi, dužni su vršiti redovan popis roba, te voditi druge vanbilansne evidencije o ulasku i izlasku roba iz skladišta, te takve evidencije redovno usklađivati sa knjigovodstvenim i drugim evidencijama Direkcije.
- (2) Direkcija je dužna vršiti redovnu kontrolu uskladištenih roba kod skladištara najmanje jednom u šest mjeseci, a po potrebi i češće.

#### **IV - TAJNOST PODATAKA**

#### **Član 16.**

##### **(Tajnost podataka poslovanja robnih rezervi)**

- (1) Direkcija posluje robnim rezervama na transparentan način, osim u slučaju podataka koji su zaštićeni u skladu sa Zakonom o zaštiti tajnih podataka („Službeni glasnik BiH“, br. 54/05 i 12/09).
- (2) Cjelokupna struktura robnih rezervi, sveukupne količine robnih rezervi, sveukupna vrijednost robnih rezervi, skladištenje i znavljanje robnih rezervi, kao i teritorijalni razmještaj robnih rezervi smatra se tajnim podatkom.
- (3) Ugovori koji sadrže tajne podatke iz stava (2) ovog člana smatraju se državnom tajnom u kontekstu Zakona o javnim nabavkama Bosne i Hercegovine („Službeni glasnik BiH“, broj: 39/14).
- (4) Dokumenti iz stava (2) ovog člana biće zaštićeni u skladu sa odredbama Zakona o zaštiti tajnih podataka, sa jednim od stepena tajnosti.
- (5) Direktor Direkcije propisuje stepen tajnosti podataka, u skladu sa propisima koji uređuju tajnost podataka.

#### **Član 17.**

##### **(Nadležnost Vlade)**

- (1) Nabavka robe za robne rezerve se vrši u skladu sa propisima kojima se uređuju javne nabavke, osim u slučajevima kada se vrši otkup poljoprivrednih proizvoda od poljoprivrednih proizvođača za koje je propisana zaštitna cijena, ili kada bi primjena postupka javne nabavke dovela do otkrivanja tajnih podataka, o čemu Vlada donosi posebnu odluku.
- (2) Vlada će samostalno ili na prijedlog direktora Direkcije, u slučajevima krajnje hitnosti, u skladu sa članom 9. ovog zakona, naložiti direktoru Direkcije da na pojedinačne nabavke robnih rezervi, radova i usluga odredi oznaku stepena tajnosti i u skladu sa pozitivnim zakonskim propisima izvrši nabavku roba, usluga i radova.

## V – FINANSIRANJE, NABAVKA, PRODAJA I UPRAVLJENJE ROBNIM REZERVAMA

### Član 18.

#### (Finansiranje robnih rezervi)

- (1) Finansiranje robnih rezervi Kantona obezbjeđuje se iz:
  - a) budžeta Kantona;
  - b) sredstava ostvarenih prodajom robe;
  - c) kreditnih linija;
  - d) donacija u robi i novcu;
  - e) drugih izvora u skladu sa važećim propisima.
- (2) O vidovima finansiranja robnih rezervi Kantona, a u skladu sa Planom nabavki robnih rezervi, odlučuje direktor Direkcije, uz prethodnu saglasnost Vlade.

### Član 19.

#### (Nabavka roba robnih rezervi)

- (1) Nabavku robe, odnosno znavljanje robnih rezervi Direkcija obavlja kupovinom, zamjenom, prodajom i davanjem na zajam radi znavljanja, a na način i u skladu sa članom 16. ovog zakona.
- (2) Nabavku poljoprivrednih proizvoda za koje su propisane zaštitne cijene, odobrava Vlada, na prijedlog direktora Direkcije.

### Član 20.

#### (Prodaja robnih rezervi)

- (1) Roba iz robnih rezervi može se prodavati u slijedećim slučajevima:
  - a) radi znavljanja krajnjim korisnicima, a prije isteka roka upotrebe;
  - b) intervencije na tržištu;
  - c) prodaje viškova kupljenih proizvoda iznad utvrđenog obima potrebnog za robne rezerve.
- (2) Uslove i postupak prodaje roba robnih rezervi, iz stava (1) tač. b) i c) ovog člana odobrava Vlada, na prijedlog direktora Direkcije.

### Član 21.

#### (Upravljanje robnim rezervama)

Upravljanje robnim rezervama Vlada vrši na slijedeće način:

- a) odobrava Plan nabavke robnih rezervi, proizvodnje i otkupa tržišnih viškova za robne rezerve, kao i uslove prodaje robnih rezervi;
- b) odobrava obim i strukturu robnih rezervi;
- c) odobrava načine finansiranja robnih rezervi;
- d) odobrava način obezbjeđivanja i korištenja robnih rezervi;
- e) odobrava srednjoročni program formiranja robnih rezervi od pet godina;
- f) usvaja Izvještaj o radu sa finansijskim izvještajem u tekućoj godini za prethodnu godinu;
- g) donosi godišnji Program rada Direkcije i Finansijski plan Direkcije;



- h) donosi posebnu odluku u slučajevima kada se vrši otkup poljoprivrednih proizvoda od poljoprivrednih proizvođača ili kada bi primjena postupka javne nabavke dovela do otkrivanja tajnih podataka;
- i) u slučajevima krajnje hitnosti, u skladu sa članom 9. ovog zakona, nalaže rukovodiocu Direkcije da na pojedinačne nabavke robnih rezervi, radova i usluga odredi oznaku stepena tajnosti i u skladu sa pozitivnim zakonskim propisima izvrši nabavku roba, usluga i radova;
- j) odlučuje o privremenom angažovanju opreme i ljudi za potrebe Direkcije;
- k) odobrava korištenje robnih rezervi u slučaju vanrednih situacija i intervencija na tržištu kantonima, entitetima i Brčko Distriktu;
- l) dopunjuje ili vrši zamjenu određenih roba iz člana 4. stav (1) ovog zakona, a u slučaju nastanka okolnosti iz člana 9. ovog zakona;
- m) propisuje količine roba robnih rezervi za potrebe Kantona u formi normativa.

## **VI - POSLOVANJE DIREKCIJE ZA ROBNE REZERVE**

### **Član 22.**

#### **(Poslovanje robnim rezervama)**

- (1) Poslove robnih rezervi u Kantonu obavlja Direkcija, kao samostalna kantonalna upravna organizacija sa svojstvom pravnog lica.
- (2) U okviru svojih nadležnosti Direkcija:
  - a) vrši nabavku, znavljanje, uskladištenje, distribuciju i transport robnih rezervi Kantona;
  - b) interveniše na tržištu, uz saglasnost Vlade, u slučaju poremećaja snabdijevanja ili drastičnog rasta cijena roba koje su predmet robnih rezervi;
  - c) vrši distribuciju roba iz robnih rezervi krajnjim korisnicima;
  - d) obavlja i druge poslove utvrđene ovim zakonom.

### **Član 23.**

#### **(Poslovanje Direkcije)**

- (1) U okviru izvršavanja svojih poslova utvrđenih ovim zakonom, Direkcija zaključuje ugovore u svoje ime, a za račun Kantona.
- (2) Poslove nabavki roba za robne rezerve na domaćem tržištu Direkcija će obavljati samostalno.
- (3) Poslove nabavki roba za robne rezerve iz uvoza, Direkcija obavlja putem ovlaštenih spoljnotrgovinskih preduzeća. Direkcija u pravilu svake godine bira poslovnog subjekta za poslove uvoza roba, na osnovu javnog poziva u skladu sa zakonom.
- (4) Za obaveze nastale po ugovorima koje Direkcija zaključi u svoje ime, a za račun Kantona, odgovara Kanton sredstvima budžeta.

1  
18

## **Član 24.**

### **(Zaključivanje ugovora)**

Direkcija može zaključivati ugovore i preuzimati druge pravne radnje u svoje ime i za svoj račun kada se radi o preuzimanju prava i obaveza za samu Direkciju, a tiče se tekućeg poslovanja Direkcije.

## **Član 25.**

### **(Direktor Direkcije)**

(1) Direktor Direkcije:

- a) predstavlja i zastupa Direkciju;
- b) organizira i osigurava zakonito, blagovremeno i efikasno obavljanje svih poslova i zadataka iz nadležnosti Direkcije;
- c) donosi provedbene propise i druge opće i pojedinačne akte za koje je zakonom ovlašten i poduzima druge mjere za vršenje poslova iz nadležnosti Direkcije;
- d) odlučuje, u skladu sa zakonom, o pravima, obavezama i odgovornostima državnih službenika i namještenika iz radnog odnosa i vrši druge poslove za koje je zakonom i drugim propisima ovlašten;
- e) obezbjeđuje saradnju Direkcije sa ministarstvima Kantona;
- f) obezbjeđuje saradnju Direkcije sa ostalim kantonalnim direkcijama, te sa direkcijama na nivou entiteta i Brčko Distrikta.

(2) Direktor Direkcije predlaže Vladi:

- a) program rada Direkcije koji sadrži Plan nabavki robnih rezervi;
- b) finansijski plan Direkcije;
- c) količine roba robnih rezervi za potrebe Kantona u formi normativa;
- d) načine korištenja i upotrebe robnih rezervi;
- e) uslove prodaje robnih rezervi;
- f) izvještaj o radu sa finansijskim izvještajem u tekućoj godini za prethodnu godinu;
- g) prijedlog za privremeno angažovanje opreme i ljudi za potrebe Direkcije;
- h) da, u slučajevima krajnje hitnosti, u skladu sa članom 9. ovog zakona, odobri da se pojedinačne nabavke robnih rezervi, radova i usluga označe određenim stepenom tajnosti;
- i) da, u slučajevima kada se vrši otkup poljoprivrednih proizvoda od poljoprivrednih proizvođača ili kada bi primjena postupka javne nabavke dovela do otkrivanja tajnih podataka, o ovoj vrsti postupka donese posebnu odluku;
- j) propise i akte iz nadležnosti Direkcije.

(3) Kontrolu poslovanja Direkcije vrše ovlašteni državni organi, a izvještaje o kontroli poslovanja Direkcije, razmatra Vlada.

## **VII – MREŽA VOLONTERA**

### **Član 26.**

#### **(Osnivanje mreže volontera)**

Direkcija će za potrebe djelovanja u vanrednim situacijama osnovati mrežu volontera Direkcije.

#### **Član 27.**

##### **(Sredstva za opremanje i finansiranje volontera)**

Direkcija će osigurati sredstva za opremanje i finansiranje mreže volontera u vanrednim situacijama.

#### **Član 28.**

##### **(Rad mreže volontera)**

Rad mreže volontera Direkcije će biti definisan posebnim propisom koji će donijeti Direkcija u skladu sa pozitivnim zakonskim propisima.

### **VIII – NADZOR I KAZNE NE ODREDBE**

#### **Član 29.**

##### **(Nadzor)**

Nadzor nad provođenjem odredaba ovog zakona obavljaju, u okviru Kantonalne uprave za inspeksijske poslove, tržišna, sanitarna i veterinarska inspekcija Kantona, svaka iz svog djelokruga rada.

#### **Član 30.**

##### **(Kaznene odredbe za poslovne subjekte)**

- (1) Novčanom kaznom od 2.000 do 50.000 konvertibilnih maraka (u daljem tekstu: KM) kaznit će se poslovni subjekti ako:
- a) ne koristi robne rezerve u skladu s odredbom iz člana 13. ovog zakona;
  - b) ne izvršava obaveze iz ugovora o skladištenju robnih rezervi (čl. 14., 15.);
  - c) koristi robne rezerve suprotno uslovima koje propiše Vlada;
  - d) ne omogući licu ovlaštenom od strane Direkcije da vrši kontrolu količine i kvaliteta uskladištenih robnih rezervi, u skladu sa članom 15. ovog zakona;
  - e) na zahtjev ovlaštenog inspektora ne stavi na uvid isprave i svu potrebnu dokumentaciju koja se odnosi na robne rezerve;
  - f) ako se ispostavi da u svakom trenutku nema na stanju uskladištenu količinu robnih rezervi odgovarajućeg kvaliteta u skladu sa ugovorom o skladištenju;
  - g) ako blagovremeno ne spriječi i ne preduzme potrebne mjere pa zbog toga nastane materijalna šteta na robi koja čini robne rezerve.
- (2) Za slučajeve iz stava (1) tač. a), b), c), d), e), f) i g) ovog člana kaznit će se i odgovorno lice u poslovnom subjektu novčanom kaznom od 300 do 2.000 KM.

#### **Član 31.**

##### **(Kaznene odredbe za direktora Direkcije)**

Novčanom kaznom od 300 do 2.000 KM kaznit će se direktor Direkcije ako:

- a) prodaje robu iz robnih rezervi suprotno uslovima koje utvrdi Vlada (član 20.);
- b) robu iz robnih rezervi povjeri na skladištenje i čuvanje suprotno čl. 13., 14. i 15. ovog zakona;
- c) ako ne obezbjeđuje saradnju Direkcije sa kantonalnim ministarstvima;
- d) ako ne dostavi Vladi Program rada, Finansijski plan, Izvještaj o radu sa finansijskim izvještajem u tekućoj godini za prethodnu godinu Direkcije.

## **IX - PRIJELAZNE I ZAVRŠNE ODREDBE**

### **Član 32.**

#### **(Donošenje podzakonskih propisa)**

U roku od tri mjeseca od dana stupanja na snagu ovog zakona, direktor Direkcije donijet će:

- a) Pravilnik o načinu utvrđivanja kala, loma, rastura i rizika u skladišnim objektima;
- b) Pravilnik o materijalno-robnom poslovanju Direkcije za robne rezerve Kantona Sarajevo;
- c) Pravilnik o procedurama nabavke, skladištenja i zadržavanja robnih rezervi po izuzeću od propisa kojima se uređuju javne nabavke.

### **Član 33.**

#### **(Prestanak važenja ranijeg propisa)**

Danom stupanja na snagu ovog zakona prestaje da važi Zakon o robnim rezervama Kantona Sarajevo („Službene novine Kantona Sarajevo“, broj : 13/99).

### **Član 34.**

#### **(Stupanje na snagu)**

Ovaj zakon stupa na snagu osmog dana od dana objavljivanja u “Službenim novinama Kantona Sarajevo”, a primjenjivat će se u roku od 30 dana od dana stupanja na snagu ovog zakona.

**PREDSJEDAVAJUĆI SKUPŠTINE  
KANTONA SARAJEVO**

**Elvedin Okerić**

Broj:  
Sarajevo, .2022. godine

**POPIS ROBA KOJA ČINI  
ROBNE REZERVE KANTONA SARAJEVO**

**I – OSNOVNI POLJOPRIVREDNI I PREHRAMBENI PROIZVODI**

- a. Pšenica
- b. Kukuruz
- c. Brašno
- d. Geršlo
- e. Riža
- f. Grah
- g. Ostale mahunarke
- h. Tjestenina
- i. Germa

**II- MESO I PRERAĐEVINE OD MESA**

- a. Rezerve mesa u živoj stoci
- b. Sušeno meso
- c. Mesne konzerve
- d. Riblje konzerve

**III- MLIJEKO I MLIJEČNE PRERAĐEVINE**

- a. Mlijeko u prahu
- b. Mlijeko trajno
- c. Sirevi

**IV - MASNOĆE**

- a. Biljna mast
- b. Masti životinjskog porijekla
- c. Suncokretovo ulje

**V –ZASLAĐIVAČI**

- a. Šećer
- b. Med

**VI- SOL I ZAČINI**

- a. Kuhinjska sol
- b. Začin za jelo
- c. Biber
- d. Mljevena paprika

## **VII- KONZERVIRANO VOĆE I POVRĆE**

- a. Voćna mermelada
- b. Sušeno voće
- c. Sušeno povrće
- d. Konzervirano voće
- e. Konzervirano povrće

## **VIII – DJEČIJA HRANA**

- a. Adaptirano mlijeko u prahu
- b. Dječija hrana slana
- c. Dječija hrana voćna
- d. Keks
- e. Eurokrem

## **IX – OSTALO**

- a. Voda
- b. Kafa, čaj i sokovi
- c. Orašasti plodovi, sjemenke, pahuljice
- d. Cjelodnevni suhi obrok
- e. Supe koncentrat
- f. Jaja u prahu

## **SIROVINE, ALATI I REPRODUKCIONI MATERIJAL ZA INDUSTRIJU**

### **I- NAFTNI DERIVATI**

- a. Eurodizel-Diesel gorivo
- b. Motorni benzin BMB 95
- c. Lož ulje
- d. Mazut
- e. Petrolej
- f. Antifriz

### **II- GRAĐEVINSKI MATERIJALI**

- a. Betonsko željezo – rebrasto i glatko
- b. Cement
- c. Ciglarski proizvodi

### **III- HIGIJENSKO TEHNIČKA ZAŠTITA**

- a. Sve vrste HTZ opreme

### **IV- PROIZVODI OD PLASTIČNIH MASA**

- a. Plastične folije
- b. Plastične cijevi za vodovod, kanalizaciju i plinovod

## **V- KARTONSKI I PAPIRNI PROIZVODI**

- a. Roto-papir
- b. Karton
- c. Kartonska ljepenka

## **VI- AKUMULATORI I ELEKTROLIT**

- a. Akumulatori
- b. Elektrolit

## **VII- VOZILA, AGREGATI I PUMPE**

- a. Razne vrste vozila
- b. Agregati za struju
- c. Pumpe za vodu
- d. Potopne pumpe

## **OPREMA I ROBA ZA OPSKRBU, SMJEŠTAJ**

- a. Šatori
- b. Vreće za spavanje
- c. Vreće za mrtvace
- d. Poljski ležajevi
- e. Jastuci
- f. Jastučnice
- g. Deke
- h. Plahte
- i. Spremnici za vodu
- j. Sanitarna oprema
- k. Ogrjevni materijali
- l. Oprema za zbrinjavanje otpada
- m. Komplet za jelo i piće (PVC)
- n. Plinska svjetiljka s bocom
- o. Svjetiljka aku lampa
- p. Svijeće
- r. Šibice
- s. Krema za obuću

## **ZDRAVSTVENO ZBRINJAVANJE STANOVNIŠTVA**

- a. Lijekovi
- b. Medicinska sredstva
- c. Sanitetski materijal
- d. Sterilni setovi prve pomoći za domaćinstvo

## **HIGIJENSKO-KOZMETIČKI PROIZVODI I PAPIRNA KONFEKCIJA**

- a. Deterdžent za rublje
- b. Deterdžent za suđe
- c. Pasta za zube
- d. Četkica za zube
- e. Sapun
- f. Toalet papir
- g. Papirnati ručnici
- h. Higijenski ulošci
- i. Vlažne maramice
- j. Pelene dječije
- k. Pelene za inkontinenciju
- l. Sredstva za čišćenje i solna kiselina

## **SREDSTVA ZA ASANACIJU**

- a. Sredstva za dezinfekciju vode i prostora
- b. Sredstva za dezinfekciju
- c. Sredstva za deratizaciju



## O B R A Z L O Ž E N J E

### I PRAVNI OSNOV ZA DONOŠENJE ZAKONA

Pravni osnov za donošenje ovog zakona sadržan je:

Članom 18. stav (1) tačka b) Ustava Kantona Sarajevo („Službene novine Kantona Sarajevo” br. 1/96, 2/96-Ispravka, 3/96-Ispravka, 16/97, 14/00, 4/01, 28/04, 6/13 i 31/17) kojim je propisano da **Skupština Kantona donosi zakone** i druge propise u okviru izvršavanja nadležnosti Kantona, izuzev propisa koji su ovim Ustavom ili zakonom dati u nadležnost Vlade Kantona.

### II. RAZLOZI ZA DONOŠENJE ZAKONA

(1) Obzirom na značaj Direkcije za robne rezerve Kantona Sarajevo, koja uz saglasnost Vlade Kantona Sarajevo samostalno obavlja poslove robnih rezervi na području Kantona Sarajevo, pristupilo se donošenju gore navedenog novog zakona iz razloga kako slijedi:

a) radi boljeg definisanja načela poslovanja i upravljanja robnim rezervama Kantona Sarajevo;

b) radi boljeg definisanja strukture, formiranja, obnavljanja, korištenja, skladištenja, čuvanja, finansiranja, nabavke i prodaje robnih rezervi;

c) preciziranja tajnosti poslovanja i postupaka nabavki robnih rezervi;

d) s obzirom da izmjena materijalnog propisa prelazi 51% sadržaja starog propisa.

(2) Obzirom na gore navedeno, a detaljno analizirajući materijalni propis koji je na snazi, došlo se do zaključka da je priprema novog zakona najefikasnije rješenje.

### III. PRIJEDLOG PRAVNIH RJEŠENJA

Članom 1. je propisan predmet zakona, odnosno kroz opće odredbe šta se uređuje navedenim zakonom, u smislu načela poslovanja, strukture, uslova za formiranje, znavljanje, korištenje, skladištenje, čuvanje, tajnost, finansiranje, nabavka, prodaja, upravljanje i druga pitanja vezana za poslove robnih rezervi.

Članom 2. je propisana gramatička terminologija.

Članom 3. su propisana načela poslovanja i upravljanja robnim rezervama.

Čl. 4., 5., 6., 7., 8. propisana je struktura, formiranje, godišnji plan, kupovina i znavljanje robnih rezervi.

Članom 9. propisano je korištenje robnih rezervi.

Članom 10. propisan je poremećaj na tržištu.

Članom 11. propisano je skladištenje i čuvanje robnih rezervi.

Članom 12. propisani su poslovnii prostori.

Članom 13. propisane su obaveze poslovnii subjekata.

Čl. 14. i 15. propisano je osiguranje i popis roba robnih rezervi.

**Članom 16.** propisana je tajnost podataka poslovanja robnih rezervi, u skladu sa Zakonom o zaštiti tajnih podataka („Službeni glasnik BiH“, br. 54/05 i 12/09).

**Članom 17.** propisana je nadležnost Vlade, odnosno Direkcije u pojedinačnim nabavkama na koje se stavlja stepen tajnosti u skladu sa propisima.

**Čl. 18., 19. i 20.** propisano je finansiranje, nabavka i prodaja robnih rezervi.

**Članom 21.** propisano je upravljanje robnim rezervama.

**Čl. 22., 23., 24. i 25.** propisano je poslovanje robnim rezervama, poslovanje Direkcije, zaključivanje ugovora i djelokrug rada direktora Direkcije.

**Čl. 26., 27. i 28.** propisano je osnivanje, djelovanje volontera i rad mreže volontera.

**Članom 29.** propisano je vršenje nadzora nad provođenjem zakona.

**Čl. 30. i 31.** propisane su kaznene odredbe.

**Članom 32.** propisano je donošenje podzakonskih propisa.

**Čl. 33. i 34.** propisan je početak primjene i stupanje na snagu ovog zakona.

#### **IV. PROCEDURA**

Direkcija predlaže donošenje, odnosno usvajanje zakona po redovnoj proceduri.

#### **V. FINANSIJSKA SREDSTVA**

Za provođenje ovog zakona obezbijedena su finansijska sredstva u Budžetu Kantona Sarajevo, na poziciji Direkcije za robne rezerve Kantona Sarajevo.



Bosna i Hercegovina  
Federacija Bosne i Hercegovine  
KANTON SARAJEVO  
Ured za zakonodavstvo Vlade Kantona  
Sarajevo



Босна и Херцеговина  
Федерација Босне и Херцеговине  
КАНТОН САРАЈЕВО  
Уред за законодавство Владе  
Кантона Сарајево

Bosnia and Herzegovina  
Federation of Bosnia and Herzegovina  
CANTON SARAJEVO  
Office for Legislature of Sarajevo Canton  
Government

Broj: 09-02-18674/22  
Sarajevo, 13.06.2022. godine

KANTON SARAJEVO  
DIREKCIJA ZA ROBNE REZERVE

**PREDMET: Stručno mišljenje na nacrt Zakona o robnim rezervama  
Kantona Sarajevo.-**

Na osnovu člana 2. Uredbe o Uredu za zakonodavstvo Vlade Kantona Sarajevo ("Službene novine Kantona Sarajevo", broj: 7/06-Prečišćeni tekst) i člana 4. Uredbe o postupku i načinu pripremanja, izrade i dostavljanja propisa ("Službene novine Kantona Sarajevo", broj: 50/17-Drugi novi prečišćeni tekst i 2/18-Ispravka), Ured za zakonodavstvo Vlade Kantona Sarajevo, daje sljedeće

**M I Š L J E N J E**

1. Ured za zakonodavstvo Vlade Kantona Sarajevo (u daljem tekstu:Ured) nema primjedbi na dostavljeni tekst nacrta Zakona o robnim rezervama Kantona Sarajevo (u daljem tekstu: Zakon), po pitanju njegove usklađenosti sa odredbama ustava i pozitivno-pravnih propisa koji su navedeni u obrazloženju predmetnog materijala.

Preporuka je Ureda da se vezano za odredbe nacrta Zakona u kojima su propisani slučajevi izuzetka od primjene postupka javne nabavke pribavi mišljenje Agencije za javne nabavke Bosne i Hercegovine kako bi se izbjegla različita tumačenja u pogledu izuzeća od primjene odredbi Zakona o javnim nabavkama ("Službeni glasnik Bosne i Hercegovine", broj:39/14) koji su propisani članom 10. istog zakona.

Ured nije vršio pravnu analizu popisa roba koje čine robne rezerve Kantona Sarajevo, jer se radi o stručnom pitanju koje je u isključivoj nadležnosti nosioca pripreme predmetnog materijala.

Nacrt Zakona može poslužiti kao polazna osnova za pripremu prijedloga ovog propisa.

2. Dostavljeni materijal je pripremljen u skladu sa Uredbom o postupku i načinu pripremanja, izrade i dostavljanja propisa ("Službene novine Kantona Sarajevo", broj: 50/17- Drugi novi prečišćeni tekst i 2/18- Ispravka), te se isti može razmatrati na jednoj od narednih sjednica Vlade Kantona Sarajevo, uz napomenu da se predmetni materijal dopuni sa mišljenjem Ministarstva finansija Kantona Sarajevo s obzirom da je za primjenu ovog propisa potrebno obezbijediti budžetska sredstva.

Dostaviti:

1. Naslovu
2. Evidencija
3. Arhiva



Admiral dipl. pravnik



Adresa: Hamida Dizdara 1, 71000 Sarajevo  
Tel: + 387(0)33 560-449, Fax: + 387 (0) 33 560-448  
Web: <http://vlada.ks.gov.ba>, E-mail: [uz@vlada.ks.gov.ba](mailto:uz@vlada.ks.gov.ba)





Bosnia and Herzegovina  
Federation of Bosnia and Herzegovina  
CANTON SARAJEVO  
Ministry of Justice and Administration

Broj: 03-04-02-24763/22  
Sarajevo, 21.06.2022. godine

## DIREKCIJA ZA ROBNE REZERVE

Alipašina bb,  
71 000 Sarajevo,  
gđa Jelena Pekić, direktorica

**PREDMET: Nacrt Zakona o robnim rezervama Kantona Sarajevo, mišljenje –  
VEZA: Vaš akt, broj:02-25-246-2/22 od 15.06.2022.godine**

Postupajući po Vašem aktu, broj i datum gornji, na osnovu odredbi člana 7. Zakona o ministarstvima i drugim organima uprave Kantona Sarajevo ("Službene novine Kantona Sarajevo", broj 36/21) i člana 4. stav 2. Uredbe o postupku i načinu pripremanja, izrade i dostavljanja propisa ("Službene novine Kantona Sarajevo", br. 50/17 i 2/18-Ispravka), Ministarstvo pravde i uprave razmotrilo je dostavljeni nacrt Zakona i daje sljedeće


### MIŠLJENJE

Nacrt Zakona o robnim rezervama Kantona Sarajevo je propis kojim se ne povrjeđuju prava zaštićena odredbama Evropske konvencije o zaštiti ljudskih prava i osnovnih sloboda, niti je u suprotnosti sa drugim pravnim aktima, kojima je utvrđena zaštita ljudskih prava i sloboda.

S poštovanjem,

Dostaviti:  
1. Naslovu;  
2. a/a.







Broj: 08-03-11-24764/22 MD  
Sarajevo, 20.06.2022. godine

## KANTON SARAJEVO DIREKCIJA ZA ROBNE REZERVE

**Predmet:** Mišljenje na Prijedlog Zakona o robnim rezervama Kantona Sarajevo;

**Veza:** Vaš dopis, broj: 02-25-246-1/22 od 15.06.2022. godine;

Vežano za Vaš zahtjev za mišljenje na Prijedlog Zakona o robnim rezervama Kantona Sarajevo, u skladu sa članom 8. Pravilnika o proceduri za izradu izjave o fiskalnoj procjeni zakona, drugih propisa i akata planiranja na budžet („Službene novine Federacije BiH“, br. 34/16 i 15/18), dajemo sljedeće mišljenje:

Direkcija za robne rezerve Kantona Sarajevo je postupila u skladu sa navedenim Pravilnikom i Ministarstvu finansija uz Prijedlog Zakona o robnim rezervama Kantona Sarajevo dostavila na mišljenje popunjen i potpisan obrazac IFP-NE u kojem je data sljedeća izjava: „Izjavljujem da za Zakon o robnim rezervama ne postoji dodatni fiskalni efekat“.


Obzirom da za provođenje Prijedloga Zakona o robnim rezervama Kantona Sarajevo nisu potrebna dodatna sredstva iz Budžeta Kantona Sarajevo, na navedeni Prijedlog Zakona o robnim rezervama Kantona Sarajevo, Ministarstvo finansija, sa aspekta fiskalnog učinka na Budžet, nema primjedbi.

Ovo mišljenje je dato u skladu sa odredbama Prijedloga Zakona koji se obrađuje i podataka navedenih u Obrascu IFP-NE Izjave o fiskalnoj procjeni, čija tačnost je u isključivoj odgovornosti Predlagača, te ukoliko se naknadno utvrdi da navedene odredbe i podaci odstupaju od stvarno činjeničnog stanja, ovo mišljenje će se staviti van snage.

S poštovanjem,

Dostaviti:

1. Naslovu
2. MF-Sektor za budžet i fiskalni sistem
3. a/a




OVLAŠTENJE MINISTRA  
POMOĆNIK MINISTRA

Sanel Gazića, dipl.ecc.

Pripremio: Mensura Drakovac, BA menadžmenta  
Kontrolisala: Amina Močević, mr. ecc.







Bosnia and Herzegovina  
Federation of Bosnia and Herzegovina  
**CANTON SARAJEVO**  
Management of the Merchandise Reserves

Broj: 01-25-382/22  
Sarajevo, 11.07.2022. godine

**AGENCIJA ZA JAVNE NABAVKE**  
Maršala Tita 9a/I  
71 000 Sarajevo

**PREDMET: Mišljenje, traži se**

Poštovani,

Direkcija za robne rezerve Kantona Sarajevo je u fazi izrade novog Zakona o robnim rezervama Kantona Sarajevo. U okviru redovne procedure, Ured za zakonodavstvo Vlade Kantona Sarajevo traži od Direkcije da pribavi mišljenje Agencije za javne nabavke Bosne i Hercegovine u dijelu koji se odnosi na slučajeve izuzetka od primjene postupka javne nabavke, a što je tretirano članovima 16., 17. i 19. nacrtu Zakona, a kako bi se izbjegla različita tumačenja u pogledu izuzeća od primjene odredbi Zakona o javnim nabavkama koji su propisani članom 10. istog zakona.

Napominjemo da je na pripremi nacrtu zakona u pogledu gore pomenutih članova radila Radna grupa formirana od strane Vlade Kantona Sarajevo, a koju su činili pored predstavnika Direkcije i Vlade, i predstavnici Ministarstva sigurnosti Bosne i Hercegovine sa ciljem usaglašavanja nacrtu Zakona sa Zakonom o zaštiti tajnih podataka.

Stoga Vas molimo da nam date mišljenje na nacrt Zakona o robnim rezervama kako bi isti uputili u dalju proceduru prema Vladi Kantona Sarajevo i Skupštini Kantona Sarajevo na razmatranje i usvajanje.

U prilogu dostavljamo stručno mišljenje na nacrt Zakona o robnim rezervama Kantona Sarajevo dato od Ureda za zakonodavstvo Vlade Kantona Sarajevo br. 09-02-18674/22, te Nacrt Zakona o robnim rezervama Kantona Sarajevo.

S poštovanjem,

Dostaviti:

1. Gornji naslov
2. a/a



**DIREKTORIJA**

Jelena Pešić mag. oec.

e-mail: [info@dr.ks.gov.ba](mailto:info@dr.ks.gov.ba)

Tel: + 387 (0) 33 696-501, + 387 (0) 33 696-502,

Fax: + 387 (0) 33 696-503

Sarajevo, Alipašina bb





BOSNA I HERCEGOVINA  
AGENCIJA ZA JAVNE NABAVKE/NABAVE



БОСНА И ХЕРЦЕГОВИНА  
АГЕНЦИЈА ЗА ЈАВНЕ НАБАВКЕ

BOSNIA AND HERZEGOVINA  
PUBLIC PROCUREMENT AGENCY

Bosna i Hercegovina  
Federacija Bosne i Hercegovine  
KANTON SARAJEVO

Broj: 02-02-1-1729-2/22  
Sarajevo, 18.07.2022. godine

PRIMLJENO			
Organizacioni broj	Redni broj	Datum	Broj strana
011	25	19.07.2022	382-1

**DIREKCIJA ZA ROBNE REZERVE KANTONA SARAJEVO**

Alipašina bb  
71000 Sarajevo  
Faks: 696 503

Predmet: Mišljenje na nacrt Zakon o robnim rezervama Kantona Sarajevo  
Veza: Vaš akt broj 01-25-382/22 od 11.07.2022. godine

Poštovani,

Odredbom člana 92. stav (3) Zakona o javnim nabavkama ("Službeni glasnik BiH", broj 39/14) definisane su nadležnosti Agencije za javne nabavke BiH.

Uloga Agencije je da osigura pravilno provođenje Zakona. Za ostvarivanje uloge Agencije utvrđene su sljedeće nadležnosti:

- priprema i izrada nacрта zakona, nacрта izmjena i dopuna zakona i pratećih podzakonskih akata, u svrhu osiguranja njihove djelotvornosti i svrsishodnosti;
- unapređenje informiranosti ugovornih organa i ponuđača o propisima o javnim nabavkama i njihovim ciljevima, postupcima i metodama;
- objavljivanje priručnika i uputstava, kao i izrada i ažuriranje standardnih obrazaca i modela u skladu s odredbama ovog zakona;
- pružanje tehničke pomoći i savjetodavnih mišljenja ugovornim organima i ponuđačima u vezi s pravilnom primjenom ovog zakona i podzakonskih akata;
- uspostavljanje sistema praćenja postupaka koje provode ugovorni organi za nabavku robe, usluga i radova, s ciljem edukacije i otklanjanja uočenih nepravilnosti u pojedinačnim postupcima javnih nabavki;
- prikupljanje podataka, izrada analize i objavljivanje informacija u vezi s postupcima javnih nabavki i dodijeljenim ugovorima o javnim nabavkama;
- razvijanje i uspostava elektronskih informacionih sistema u oblasti javnih nabavki u Bosni i Hercegovini;
- pokretanje, podržavanje i stvaranje pretpostavki za razvoj prakse elektronskih nabavki i komunikacija u oblasti javnih nabavki;
- organiziranje i održavanje obuka za ovlaštene predavače i službenike za javne nabavke, objavljivanje informacija u vezi s obukama, te priprema priručnika i drugih pratećih materijala za profesionalni razvoj u oblasti javnih nabavki u skladu s podzakonskim aktom koje donosi Vijeće ministara BiH;
- praćenje rada ovlaštenih predavača i vođenje evidencije o akreditiranim predavačima iz oblasti javnih nabavki i službenicima za javne nabavke;
- izrada godišnjih izvještaja za Vijeće ministara BiH.

Imajući u vidu gore navedene nadležnosti, Agencija za javne nabavke BiH nema nadležnosti da daje mišljenja niti komentare na Zakone, podzakonske i druge akte koje donose drugi organi/institucije na bilo kojem nivo vlasti u Bosni i Hercegovini.

S poštovanjem,

AGENCIJA ZA JAVNE NABAVKE  
BOSNE I HERCEGOVINE  
DIREKTOR  
Dr. sc. Vahid Rahić, dipl. pravnik

Dostavljeno:

- naslovu
- a/a

## ZAKON

### O ROBNIM REZERVAMA KANTONA SARAJEVO

#### I - OPĆE ODREDBE

##### Član 1.

Ovim zakonom uređuje se struktura, formiranje, uskladištenje, obnavljanje, korištenje, finansiranje, upravljanje i druga pitanja vezana za poslovanje robnim rezervama na području Kantona Sarajevo (u daljem tekstu: robne rezerve).

##### Član 2.

Robne rezerve čine osnovni industrijski, poljoprivredni i prehrambeni proizvodi, energenti, sredstva za opću i ličnu higijenu, lijekovi i sanitetski materijal.

Robne rezerve čine i novčana sredstva koje treba da obezbijedi Kanton Sarajevo (u daljem tekstu: Kanton), grad Sarajevo, općine u sastavu Kantona i preduzeća od interesa za proizvodnju, nabavku i distribuciju roba.

##### Član 3.

Poslovi robnih rezervi su od posebnog interesa za Kanton.

#### II - STRUKTURA, FORMIRANJE, OBNAVLJANJE I KORIŠTENJE ROBNIH REZERVU

##### Član 4.

Strukturu robnih rezervi čine:

- osnovni poljoprivredni i prehrambeni proizvodi: brašno, ulje, riba, mlijeko u prahu, keks i dječija hrana, šećer, riža, grah, tjestenina, so, germa, konzervisano meso, voće i povrće, kao i drugi proizvodi neophodni za preživljavanje stanovništva,
- rezerve mesa u živoj stoci,
- sirovine i reprodukcioni materijal za poljoprivredu i stočna hrana,
- sirovine i reprodukcioni materijal za industriju,
- odjevni industrijski proizvodi (odjeća, obuća, i slično),
- ogrijevni materijal (drvo, uglj i plin u flašama),
- sredstva za opću i ličnu higijenu (sapun, deterdžent za pranje i održavanje, pasta za zube, krema za obuću i slično),
- lijekovi i sanitetski materijal,
- novčana sredstva,
- nafta i naftni derivati, petrolej i dr.

##### Član 5.

Formiranje robnih rezervi vrši se na osnovu plana nabavke, proizvodnje i otkupa tržišnih viškova.

Plan robnih rezervi Kantona donosi Vlada Kantona na prijedlog direktora Direkcije za robne rezerve Kantona Sarajevo (u daljem tekstu: Direkcija).

Direkcija je dužna da kod planiranja nabavke i razmještaja robnih rezervi vodi računa o njihovom ravnomjernom razmještaju na teritoriji Kantona, imajući u vidu potrebe stanovništva u slučajevima korištenja tih rezervi.

Plan robnih rezervi donosi se za period od jedne godine.

Nadležna ministarstva Kantona daju prijedloge za izradu Plana robnih rezervi u dijelu koji se odnosi na robe iz njihove nadležnosti.

##### Član 6.

Planom robnih rezervi utvrđuje se:

- bilans jednomjesečnih, tromjesečnih i godišnjih robnih rezervi,
- vrsta, naziv, količina i vrijednost robnih rezervi,
- sredstva za finansiranje robnih rezervi i njihov raspored po namjenama,
- teritorijalni razmještaj robnih rezervi,
- količina robe za obnavljanje (zanavljanje),
- uslovi i mjesta pod kojim se određene vrste i količine

robnih rezervi povjeravaju na skladištenje.  
Plan robnih rezervi smatra se državnom tajnom.

##### Član 7.

Robne rezerve formiraju se kupovinom roba od proizvođača u zemlji, ugovaranjem proizvodnje pojedinih proizvoda i usluga, kupovinom roba od domaćih preduzeća koja se bave trgovačkom djelatnošću i otkupom tržišnih viškova poljoprivrednih proizvoda.

Ako na tržištu nema dovoljno domaće robe odgovarajućeg kvaliteta ili se roba ne proizvodi u zemlji, robne rezerve se mogu formirati kupovinom robe iz uvoza, po tržišnim ili propisanim cijenama.

Izuzetno robne rezerve se mogu formirati kupovinom robe, iz uvoza ako je cijena domaće robe veća za 10% od cijene robe iz uvoza.

##### Član 8.

O kupovini robe za potrebe robnih rezervi Kantona, a u skladu sa Planom robnih rezervi odlučuje direktor Direkcije.

Kupovinu robe, odnosno obnavljanje robnih rezervi Direkcija obavlja:

- javnim nadmetanjem,
- ograničeno nadmetanje (prikupljanje pisanih ponuda).

Odredbе stava 1. ovog člana ne primjenjuju se kod kupovine poljoprivrednih proizvoda za koje su propisane zaštitne cijene.

##### Član 9.

Robne rezerve Kantona održavaju se povremenim obnavljanjem, zavisno o vrsti i prirodi robe i roka upotrebe robe.

Roba se mora obnoviti najkasnije 30 (trideset) dana prije isteka roka upotrebe robe, osim ako posebnim propisom nije drugačije regulisano.

##### Član 10.

Roba iz robnih rezervi može se prodavati u slijedećim slučajevima:

- obnavljanja, prije isteka roka upotrebe,
- intervencije na tržištu,
- prodaje viškova otkupljenih proizvoda iznad utvrđenog obima potrebnog za robne rezerve.

##### Član 11.

Uslove prodaje roba iz robnih rezervi utvrđuje Vlada Kantona na prijedlog direktora Direkcije.

##### Član 12.

Robne rezerve mogu se koristiti za:

- obezbjeđenje minimalnih potreba stanovništva u uslovima rata i neposredne ratne opasnosti,
- otklanjanje poremećaja u snabdijevanju prouzrokovanih prirodnim nepogodama i drugim vanrednim prilikama,
- intervencije na tržištu u uslovima poremećaja cijena i snabdjevenosti stanovništva i privrede.

##### Član 13.

Šta se smatra poremećajem na tržištu i koje mjere intervencije treba preduzeti, odlučuje Vlada Kantona na prijedlog direktora Direkcije.

#### III - SKLADIŠTENJE I ČUVANJE ROBNIH REZERVU

##### Član 14.

U cilju smještaja i čuvanja robnih rezervi obezbjeđuje se skladišni i drugi prostor izgradnjom, dogovorom o zajedničkim ulaganjima, kupovinom i zakupom.

##### Član 15.

Vlada Kantona može poslovni prostor preduzeća koja imaju u cijelosti ili djelimično državni kapital i poslovni prostor

preduzeća u privatnom vlasništvu privremeno staviti u funkciju skladištenja robnih rezervi uz naknadu, ako ocijeni da je to od općeg interesa za odbranu zemlje i da je u skladu sa pozitivnim zakonskim propisima.

Član 16.

Preduzeća i druga pravna lica sa kojima je ugovoreno skladištenje roba iz robnih rezervi, dužna su osigurati higijensko - tehničke i zdravstvene uslove za održavanje robnih rezervi u ispravnom stanju, pravilno rukovanje i fizičku zaštitu, kao i zaštitu tajnosti podataka.

Pravna lica iz prethodnog stava ne mogu tu robu koristiti, staviti u promet, otuđiti i promijeniti joj namjenu, preuskladištiti, odnosno njom raspolagati protivno odredbama ugovora.

Član 17.

Pravna lica sa kojima je ugovoreno skladištenje roba iz robnih rezervi, dužna su robu osigurati kod nadležnih osiguravajućih institucija, a u slučaju uništenja, otuđenja ili korištenja robe suprotno odredbama ugovora, naknaditi štetu vlasniku robnih rezervi u ukupnim kvantitativnim i kvalitativnim količinama ili isplatiti nastalu štetu po tržišnim cijenama u momentu njenog potraživanja.

Član 18.

Pravna lica sa kojima je ugovoreno skladištenje roba iz robnih rezervi, dužna su vršiti redovan popis roba, te voditi druge vanbilansne evidencije o ulasku i izlasku roba iz skladište, te akve evidencije redovno usklađivati sa knjigovodstvenim i drugim evidencijama Direkcije.

Direkcija je dužna vršiti redovnu kontrolu uskladištenih roba od skladištara najmanje jednom u 6 (šest) mjeseci, a po potrebi i češće.

Član 19.

Uslove skladištenja i čuvanja određenih vrsta roba i normative, kala, kvara, rastura i loma propisat će Vlada Kantona, na prijedlog direktora Direkcije.

V - FINANSIRANJE ROBNIH REZERVU

Član 20.

Finansiranje robnih rezervi Kantona obezbjeđuje se iz:

- budžeta Kantona,
- vlastitih prihoda Direkcije,
- sredstava ostvarenih prodajom robe,
- sredstava obezbjeđenih na osnovu posebnih propisa,
- kredita,
- donacija u robi i novcu,
- drugih izvora u skladu sa važećim propisima.

VI - UPRAVLJANJE ROBNIM REZERVAMA

Član 21.

Upravljanje robnim rezervama Kantona vrši Vlada Kantona. Vlada Kantona donosi plan nabavke, proizvodnje i otkupa žižnih viškova za robne rezerve, određuje obim i strukturu robnih rezervi, obezbjeđuje sredstva, usvaja bilans i dinamiku nabavke, odlučuje o obnavljanju robnih rezervi, o vremenu i načinu obezbjeđenja i korištenja robnih rezervi.

VII - POSLOVANJE DIREKCIJE ZA ROBNE REZERVE

Član 22.

Poslove robnih rezervi u Kantonu obavlja Direkcija za robne rezerve.

U okviru svojih nadležnosti Direkcija:

- vrši nabavku, uskladištenje, distribuciju i transport robnih rezervi Kantona,
- interveniše na tržištu u slučaju poremećaja u

- snabdijevanju ili drastičnog rasta cijena osnovnih prehrambenih proizvoda, nafte i naftnih derivata,
- vrši distribuciju roba iz robnih rezervi krajnjim korisnicima,
- obavlja i druge poslove utvrđene ovim zakonom.

Član 23.

U okviru izvršavanja svojih poslova utvrđenih ovim zakonom, Direkcija zaključuje ugovore u svoje ime, a za račun Kantona.

Izuzetno, Direkcija može zaključivati ugovore i preduzimati druge pravne radnje u svoje ime i za svoj račun kada se radi o preuzimanju prava i obaveza za samu Direkciju i izvan poslova nabavke i raspolaganja sredstvima iz robnih rezervi.

Poslove nabavki roba za robne rezerve na domaćem tržištu Direkcija će obavljati samostalno.

Poslove nabavki roba za robne rezerve iz uvoza, Direkcija obavlja putem ovlaštenih spoljnotrgovinskih preduzeća. Direkcija u pravilu svake godine na osnovu javnog konkursa bira kontraktora za poslove uvoza roba.

Za obaveze nastale po ugovorima koje Direkcija zaključi u svoje ime, a za račun Kantona, odgovara Kanton sredstvima budžeta.

Član 24.

Godišnji obračun sa izvještajem o radu Direkcije usvaja Vlada Kantona.

Član 25.

Rezultat negativnog poslovanja iskazan godišnjim obračunom Direkcije, pokriva se iz budžeta Kantona.

Član 26.

Direktor Direkcije:

- zastupa i predstavlja Direkciju,
- obezbjeđuje rad Direkcije,
- obezbjeđuje pravilnost i blagovremenost u izvršavanju poslova i zadataka,
- obezbjeđuje saradnju Direkcije sa resornim ministarstvima Kantona,
- obezbjeđuje saradnju Direkcije sa Direkcijom za robne rezerve Federacije Bosne i Hercegovine,
- vrši druge poslove u skladu sa Zakonom.

Direktor Direkcije predlaže Vladi Kantona:

- program rada Direkcije,
- plan robnih rezervi,
- odluku o korištenju robnih rezervi,
- uslove uskladištenja i čuvanja robnih rezervi,
- uslove prodaje robnih rezervi,
- normative kala, kvara, rastura i loma robe,
- izvještaj o radu Direkcije,
- privremeno stavljanje poslovnog prostora i robnih rezervi preduzeća i drugih pravnih i fizičkih lica u funkciju robnih rezervi,
- stavljanje u funkciju robnih rezervi,
- privremeno angažovanje opreme i ljudi za potrebe Direkcije,
- propise i akte iz nadležnosti Direkcije.

Kontrolu poslovanja Direkcije vrše ovlaštani državni organi, a izvještaje o kontroli poslovanja Direkcije razmatra Vlada Kantona.

Član 27.

Podaci o poslovanju Direkcije smatraju se državnim tajnom.

VIII - NADZOR

Član 28.

Nadzor nad provođenjem odredaba ovog zakona obavljaju

tržišna, sanitarna i veterinarska inspekcija Kantona, svaka iz svog djelokruga rada.

#### VIII - KAZNENE ODREDBE

##### Član 29.

Novčanom kaznom od 2.000 do 50.000 konvertibilnih maraka (u daljem tekstu: KM) kaznit će se za privredni prijestup preduzeće i druga pravna lica ako:

- ne koristi robne rezerve u skladu s odredbom iz člana 12. ovog zakona,
- ne izvršava obaveze iz ugovora o skladištenju robnih rezervi (čl. 16., 17. i 18),
- koristi robne rezerve suprotno uslovima koje propiše Vlada Kantona (član 19.)

Za privredni prijestup iz prethodnog stava kaznit će se i odgovorno lice u preduzeću ili drugom pravnom licu novčanom kaznom od 300 do 2.000 KM.

##### Član 30.

Novčanom kaznom od 300 do 2.000 KM kaznit će se za privredni prijestup odgovorno lice u Direkciji ako:

- prodaje robu iz robnih rezervi suprotno uslovima koje utvrdi Vlada Kantona (čl. 10. i 11.),
- robu iz robnih rezervi povjeri na skladištenje i čuvanje suprotno uslovima koje propiše Vlada Kantona (član 19.).

#### IX - PRIJELAZNE I ZAVRŠNE ODREDBE

##### Član 31.

Ovaj zakon stupa na snagu osmog dana od dana objavljivanja u "Službenim novinama Kantona Sarajevo", a primjenjivat će se u roku od 30 dana od dana stupanja na snagu Zakona.

Broj 01-02-141/99

Predsjedavajući

1. jula 1999. godine  
Sarajevo

Skupštine Kantona Sarajevo  
Mirsad Kebo, s. r.

Na osnovu člana 12. tačka a. i člana 18. tačka b. Ustava Kantona Sarajevo ("Službene novine Kantona Sarajevo", br. 1/96, 2/96, 3/96 i 16/97), Skupština Kantona Sarajevo, na sjednici održanoj 7. jula 1999. godine, donosi

### ZAKON

#### O IZMJENAMA I DOPUNAMA ZAKONA O UNUTRAŠNJIM POSLOVIMA KANTONA SARAJEVO

##### Član 1.

U Zakonu o unutrašnjim poslovima Kantona Sarajevo ("Službene novine Kantona Sarajevo", broj 9/96) član 2. tačka 1. mijenja se i glasi:

"1. Provođenje Ustava i zakona Kantona, Federacije Bosne i Hercegovine (u daljem tekstu: Federacija) i Bosne i Hercegovine u pitanjima unutrašnjih poslova".

##### Član 2.

U članu 11. stav 3. "načelnik policije" zamjenjuju se riječima: "načelnik Policijske uprave", a riječi: "svojim zamjenikom" zamjenjuju se riječima: "zamjenikom ministra".

##### Član 3.

U članu 12. tačka 4. iza riječi "propisa" briše se tačka i zarez, a dodaju riječi: "iz nadležnosti Ministarstva";

u tački 5. iza riječi "slučajevima" riječi: "po potrebi" brišu se;

u tački 12. iza riječi "vrši" riječ "složenija" briše se;

u tački 17. iza riječi "upravama" dodaju se riječi: "i organizacionim jedinicama u sjedištu".

##### Član 4.

U članu 13. stav 3. iza riječi "pribaviti" dodaje se riječ "pismenu".

##### Član 5.

U članu 15. stav 2. alineja 2. iza riječi: "... mjesta" dodaju se riječi: "broj pripravnika koji se primaju u radni odnos i uslovi za

prijem pripravnika;"

##### Član 6.

U članu 19. st. 1. i 2. riječi: "njegov zamjenik" zamjenjuju se riječima "zamjenik ministra".

##### Član 7.

U članu 26. st. 7. i 10. riječi: "njegovim zamjenikom" zamjenjuju se riječima: "zamjenikom ministra".

##### Član 8.

Stav 2. člana 31. briše se.

##### Član 9.

Članovi 32., 33., 34., 35., 37. i 38. brišu se.

##### Član 10.

Član 64. briše se.

##### Član 11.

Član 68. briše se.

##### Član 12.

Član 69. briše se.

##### Član 13.

U članu 72. stav 1. briše se riječ "neposredno".

##### Član 14.

Član 75. mijenja se i glasi:

"Ministarstvo za svoje potrebe školuje policajce u Policijskoj akademiji.

Školovanje polaznika Policijske akademije za potrebe Ministarstva uređuje se posebnim ugovorom između ovog Ministarstva i Ministarstva unutrašnjih poslova FBiH.

Međusobna prava i obaveze Policijske akademije Ministarstva se regulišu posebnim ugovorom".

##### Član 15.

Član 76., mijenja se i glasi:

"Za polaznike Policijske akademije iz prethodnog člana za vrijeme trajanja školovanja u Akademiji osigurava se smještaj, ishrana, uniforma, obuće i rublje, udžbenici, zdravstveno i invalidsko osiguranje ukoliko to osiguranje nemaju po drugom osnovu i mjesečna primanja za neophodne lične izdatke.

Iznos mjesečnih primanja za neophodne lične izdatke polaznika Policijske akademije iz prethodnog stava ovog člana utvrđuje Vlada Kantona na prijedlog ministra".

##### Član 16.

Član 77. mijenja se i glasi:

"Ako polaznik Policijske akademije samovoljno napusti školovanje u Akademiji, zbog svoje krivice bude isključen sa školovanja, ne završi školovanje sa uspjehom ili se po završetku školovanja na Akademiji ne javi na rad ili ne ostane na radu u Ministarstvu, odnosno ualjed njegove krivice radni odnos prestane prije ugovorenog roka, dužan je nadoknaditi troškove školovanja na Policijskoj akademiji, odnosno srazmjeran dio tih troškova".

##### Član 17.

Član 78. stav 1. mijenja se i glasi:

"Polaznik Policijske akademije koji uspješno završi školovanje raspoređuje se u skladu sa ugovorenim obavezama u Ministarstvo kao pripravnik".

##### Član 18.

U članu 79. stav 1. iza alineje 8. dodaje se nova alineja 8a koja glasi:

- "načinu postupanja u prostorijama Ministarstva, sa osobama lišenim slobode".

##### Član 19.

Ovaj zakon stupa na snagu danom objavljivanja u "Službenim novinama Kantona Sarajevo".

Broj 01-02-153/99

7. jula 1999. godine



100

101

102

103